

ՎԱՐԴԱՆ ԳՐԻԳՈՐՅԱՆ

ՄԱՏԵՆԱԴԱՐԱՆԻ 1689 թ. ԼԵՀԵՐԵՆ ՀՐՈՎԱՐՏԱԿԻ ԵՎ ՆՐԱ ՊԱՏՄԱԿԱՆ ԱՐԺԵՔԸ

1962 թ. սկզբներին Լվով քաղաքի պատմության թանգարանում իմ ուշադրությունը գրավեց մագաղաթե մեծ թերթի վրա 17-րդ դարում գրված լեհերեն մի հրովարտակ, որը շնորհվել է Տիսմենիցա ավանի հայերին: Լեհաստանի թագավորներից ու իշխաններից լեհահայերի ստացած հրովարտակներից պահպանվել է մի քանի հատ, որոնք գտնվում են Լեհաստանի եւ Ռուսականայի արխիվներում ու թանգարաններում: Մեզ մոտ չկա եւ ոչ մի օրինակ, ուստի այդ հրովարտակը Մատենադարանին հանձնելու խնդրանքով դիմեցի թանգարանի տնօրինությանը, ապա Լվովի քաղխորհրդի մշակույթի բաժնին, ավելի ուշ հարկադրված եղա մեկնել Կիև եւ դիմել Ռուսականայի մշակույթի մինիստրությանը: 1962 թ. փետրվարի 27-ին մինիստրությունը որոշում կայացրեց այդ արժեքավոր վավերագիրը, որպես նվեր, հանձնելու Մատենադարանին: Տրվեց հրաման (N 15), որի համաձայն մի քանի օր անց (մարտի 2-ին) հրովարտակը դուրս գրվեց թանգարանի գույքամատյանից եւ համապատասխան գրավոր փաստաթուղթ ու ստացական կազմելուց հետո հանձնվեց ինձ: Հրովարտակը բերեցի Երեւան, եւ արդեն 43 տարի է փակցված է մեր ցուցասրահի պահարաններից մեկում մշտապես գրավելով այցելուների ուշադրությունը: Անհրաժեշտ եմ գտնում նշել, որ այդ գործում ինձ շափականց օգտակար եղավ թանգարանի գիտական աշխատակիցներից նադեժդա Կորնեեւնա Կրիվոնոսը, որը հետագայում թեկնածուական դիսերտացիա պաշտպանեց Երեւանում նյութ ունենալով լվովահայերի մշակութային կյանքի պատմության հարցերը:

Տիսմենիցա քաղաքատիպ ավանը, որը հայկական աղբյուրներում անվանվում է Դիսմինից, Դիսմենից, Թիսմանից եւ Թիշմինից ձեւերով, գտնվում է Լվովից հարավ, Խվանո-Ֆրանկովսկ (նախկին՝ Ստանիսլավ) քաղաքից 13 կմ հեռավորության վրա: 1957 թ. ամռանը Հայաստանի գիտությունների ակադեմիայի պատմության ինստիտուտի հանձնարարությամբ, հայերեն ձեռագրեր

որոնելու նպատակով Արեւմտյան Ռւկրախնայի նախկին հայաշատ վայրերը շրջելիս պատմաբան Վազգեն Ռսկանյանի հետ եղանք նաեւ այդ ավանում եւ պարզեցինք, որ վերջին պատերազմից հետո այնտեղ մնացած փոքրաթիվ հայերը, որպես Լեհաստանի քաղաքացիներ, գաղթել էին Լեհաստան։ Մնացել էր միայն ռւկրախնացու հետ ամուսնացած շուրջ 40-ամյա մի հայ կին, որը խոսում էր գուցովական մի խրթին բարբառով, այնպես, որ նրան չէր հասկանում մեզ ուղեկցող ռւկրախնացի պատմաբան Վլադիմիր Գրորովեցկին։ Հարկադրված նրա հետ խոսում էինք երկու թարգմանչի օգնությամբ։ Այդ կինը ավանի կետրոնում մեզ ցույց տվեց փլատակների մի հակա կույտ՝ այն ամենն, ինչ մնացել էր 18-րդ դարում կառուցված եւ մեր այցելությունից ընդամենը մի քանի տարի առաջ քանդված հայկական Ս. Աստվածածին (կամ Ս. Գայեթանոս) եկեղեցուց։

Ոշինչ հայտնի չէր հայ գաղութի վարչական մարմնի եւ եկեղեցու արխիվի մասին։ Եվ դա բնական էր։ Գալիցիայի եւ Պոկուտյեի տարածքներում տեղի էին ունեցել Առաջին եւ Երկրորդ համաշխարհային պատերազմների մի շարք ավերիչ ու ազմական գործողություններ, որոնց ժամանակ ոչնչացել էին նյութական ու գրավոր մշակույթի բազմաթիվ հուշարձաններ։ Մինչ այդ տեղի էր ունեցել սպիտակ ջարդն իր բոլոր հետեւանքներով։

1820 թ. Լեհաստանի հայարնակ վայրերն այցելելիս նշանավոր գիտնական Մինաս Բժշկյանը եղել էր նաեւ Տիսմենիցայում եւ Ս. Աստվածածին եկեղեցում տեսել մի Հայսմավուրք, որի հիշատակարանից մի քաղվածք զետեղել է իր գրքում¹։ Նա գրում է նաեւ եկեղեցում պահված մկրտատերի ծննդոց մատյանի մասին, որից 1713 թ. կատարված մի գրանցում հրատարակել է իր ուղեգրության մեջ²։ Լեհաստանի եւ Ռումինիայի հայաշատ վայրերից նրա տարած ձեռագրերի ցուցակից, որն այժմ պահվում է Վրաստանի Գիտությունների ակադեմիայի Կ. Ս. Կեկելիձեի անվան ձեռագրերի ինստիտուտում (հայերեն ձեռագրերի ֆոնդ նո. 28դ), երեւում է, որ Տիսմենիցայում նա նվեր է ստացել մի ձեռագիր՝ «Պատմութիւն կամ վարք սիրոյն ներսէսի մեծի, ծայրաքաղ արարեալ ի Մեսրոպայ Հարցողմանցոյ ի գաւառէն Վայոցձորոյ» ձեռագիրը։ Այլ հետաքրքիր բան Բժշկյանը չի նկատել, ուստի իր այդ ցուցակում, որը նկարագրված է Մատենադարանի հանդուցյալ աշխատակից Սամսոն Լալաֆարյանի կողմից, կատարել է հետեւալ նշումը։ «Ի

¹ Ճանապարհորդություն ի Լեհաստան եւ յայլ կողմանս բնակեալս ի հայկազանց սերելոց ի նախնեաց Անի Տաղամին, շարադրեալ հանդերձ զանազան բանասիրական տեղեկութեամբ տն. Հ. Մինասայ Բժշկեանց վարդապետի ի Միփրարեան ուխտէ առաջանորդի ի Տաւրիա, ի Վենետիկ, 1830, էջ 124։

² Նույն տեղում։

Դիսմինից – չիք ինչ պիտանի»:

Բայց, ըստ երեւույթին, Մ. Բժշկյանը չի տեսել այնտեղ պահվող մյուս գրչագրերը (կամ ցուց չեն տվել նրան): Հայտնի է, որ դրանից տարիներ անց Վիեննայի Մխիթարյան միաբանությունը Տիսմենիցայից ստացել է բավական թվով ձեռագրեր: Հակովրոս Տաշյանի ձեռագրացուցակում տպված են այդ կապակցությամբ ձեռագրերի վրա թողնված գրությունները. «Առաքեաց Վ. Հ. Բարթուղիմէոս ի Դիսմինիցէ, յամին 1895»: Այս մակագրությունն են կրում միաբանության մատենադարանում պահվող տասնհինգ ձեռագրեր, որոնց թվում 1603 թ. Լվովում գրված մի Հայսմավուրք, 1682 թ. Սեմիքլեուշում (Հունգարիա) գրված մի Սաղմոսարան, 18-րդ դարում գրված մի «Այբբենարան», 16-17-րդ դդ. կազմված ամուսնական պայմանագրերի պատճեններ, քարոզգրեր, աստվածաբանություն եւ այլն: Դրանց մեծ մասը հայատառ-դիշաղերեն է, իսկ մի ձեռագիր էլ՝ հայատառ-լեհերեն, Ռումինիայի Գեուլա քաղաքում պահվող «Տօնացոյց եւ աւետարանացոյց»-ի մեջ գրված է «Գրեցաւ եւ օրինակեցաւ այս Տօնացոյցս ի Լէհաց երկիրն, ի քաղաքն Դիսմենից, ամի Տեառն 1751 փետրուարի 21, աշխատանօք եւ գրովք իմոյ ձեռամբ Տիրացու նիկողայոսի որդւոյ Բասադասի, ի վայելումն Հայոց քահանայից....»³:

Բացի սրանից, տեղեկություն կա այն մասին, որ լեհահայ հայտնի ժամանակագիր, քերական եւ փիլիսոփա Ստեփանոս Ռոշքան Տիսմենիցայում գաղութի մեռելոց մատյանի մեջ գրել է Գրիգոր Ամիրյանի կենսագրությունը, որը մեզ չի հասել⁴: Այնպես որ Տիսմենիցայում եւս ձեռագրեր են ստեղծվել, եւ այդ բնակավայրը պետք է տեղ գտնի հայ գրչության արժեքավոր քարտեզի վրա, որը կազմել է վաստակաշատ պատմաբան (այժմ հանգուցյալ) Արտաշես Մաթեոսյանը, եւ որը կախված է Մատենադարանի ցուցասրահի մուտքի մոտ:

Ի տարբերություն լեհահայ այլ կենտրոնների, երկար ժամանակ Տիսմենիցայում հայերենը եղել է թե՛ խոսակցական, եւ թե՛ գրական լեզու:

³ Յուցակ Հայերէն ձեռագրաց Մատենադարանին Մխիթարեանց ի Վիեննա, կազմեց՝ Հ. Յակոբոս վ. Տաշեան, Վիեննա, 1895 (ձև. նո. նո. 69, 457, 441, 444, 445, 446, 447, 452, 479, 480, 481, 484, 488, 511, 536):

⁴ Կեհահայ պատմաբան Սաղոկ Բորոնչի «Կեհաստանի նշանավոր հայերի կյանքը» (S. Baroni, Żywoty sławnych Ortman w Polsce, Lwow, 1856) մեծարժեք գրքում տեղեկություններ կան Գրիգոր Ամիրյանի վերաբերյալ, որը զգալի դեր է խաղացել Տիսմենիցայի հայերի կյանքում: Գրիգոր Ազարիայի Ամիրյանը (1682-1727) հողատեր ունետու ընտանիքից էր, նա հոգեւոր մկրտությունը ստացել է Հռոմում: Վերադառնալուց հետո արքեպիսկոպոս Վարդան Հունանյանի նշանակումով եկեղեցական պաշտոն է ստացել հայկական մեկ այլ գաղութում Հորոդենկայում: 1715 թ. նա նշանակվում է Տիսմենիցայի հայերի պրոբոշ (ժողովրդապետ), այսինքն՝ ծխական ժամանակ: Փայտաշեն խարխով վիճակում գտնվող եկեղեցու փոխարեն նա կառուցում է նոր եկեղեցի, որին կից՝ հոգեւորականների համար հատուկ բնակարան:

Ռւկրաինայի պետական պատմական արխիվի՝ Լվովում գտնվող բաժանմունքում մեզ հաջողվեց գտնել մի ուշագրավ մատյան, որը պահվում է «Վիրմենսկա մետրոպոլիչնա կոնսիստորիա» մակագրությունը կրող թղթապանակի մեջ: Այնտեղ գրի են առնված Տիսմենիցայի հայերի «Անարատ հղության Ս. Մարիա տիրություն» եղբայրության 1732 թ. մինչեւ 1791 թ. արձանագրությունները, որոնք գրանցված են տեղի առօրյա խոսակցական հայերենով:

Ե՞րբ են հայերը հաստատվել Տիսմենիցայում, եւ ի՞նչ նշանակություն է ունեցել նրանց կյանքում 1689 թ. հրովարտակը:

Տիսմենիցան Մերձկարպատների ամենանշանավոր առեւտրա-արհեստավորական կենտրոններից էր: Առաջին անգամ գրավոր սկզբնաղբյուրներում հիշատակվում է 1145 թ.: Դարեր շարունակ ավանը եղել է լեհ մագնատներ Պոտոցկիների ժառանգական սեփականությունը: Տիսմենիցան շատ հարմար վայրում էր, չորս կողմը մշակովի հողեր էին, անտառներ, նաև մոտով հոսում էին ձկնառատ երկու գետեր, իսկ ամենակարեւորը՝ ավանը, գտնվում էր Լվովից Մոլդավիա տանող առեւտրական ճանապարհի վրա: 1448 թ. Տիսմենիցան ստացել էր մագդեբուրգյան իրավունք: Այնտեղ անց էին կացվում մեծ տոնավաճառներ, որոնց մասնակցում էին նաև հայ առեւտրականները, որոնք 16-րդ դ. 40-ական թթ. այնտեղ ունեին ապրանքների պահեստներ: Հայկական մշտական գաղութի հիմքը դրվել է 1679 թ. թուրքական մեծ արշավանքից հետո, երբ Կամենեց-Պոդոլսկից այնտեղ գաղթեց 42 հայ ընտանիք:

Լեհական իշխանավորները բարյացակամ վերաբերմունք ունեին հայ գաղթականների նկատմամբ, քանի որ նրանք զարկ էին տալիս արհեստներին ու առեւտրին, նպաստում այդ վայրերի տնտեսական զարգացմանը, իսկ վտանգի դեպքում մասնակցում երկրի պաշտպանությանը: Լեհ մագնատներն ամեն ձեւով աշխատում էին նպաստել հայերի ներգաղթին: Տիսմենիցայի տերը՝ Դոմինիկ Պոտոցկին, եկվոր հայերի համար ապրելու պայմաններ է ստեղծում, իր միջոցներով կառուցում է հայկական եկեղեցի: 1684 թ. նա իր ծախսով քահանա է նշանակում Հակոբ Վարդերեսովիչին՝ իր վրա վերցնելով նրա ոռճիկը վճարելու պարտականությունը:

Ինչպես այլ վայրերում, այնպես էլ Տիսմենիցայում հայերը ձգտում էին արտոնագիր ստանալ քաղաքի տիրոջից, որով վավերացվելու եւ հաստատվելու էին նրանց իրավունքները, եւ հստակ էին լինելու հարաբերությունները քաղաքի տիրոջ հետ:

Ուսումնասիրությունները ցույց են տվել այլեւայլ վայրերում ու տարբեր ժամանակներում հայերին տրված արտոնագրերի խիստ նմանությունը

միմյանց հետ: Օրինակ՝ Յուղեֆ Լյուբամիրսկու կողմից Յազլովեցի հայերին՝ 1751 թ. մարտի 19-ին տված հրովարտակը նույն բովանդակությունն ունի, ինչ կիեւի վոյեվոդ Ստանիսլավ Զալեսիուշ Պոտոցկու կողմից 1743 թ. Մոգիլյով-Պոդոլսկի հայ համայնքին տված հրամանագիրը: Համեմատությունից երեւում է, որ Ռաշկովի հայկական գաղութին 1751 թ. տրված հրամանագիրը համարյա բառացիորեն արտագրված է Զոլոչևի հայերին 1688 թ. հոկտեմբերի 29-ին Յան Սորեսկի թագավորի տված հրովարտակից, որը հաստատել է նրա որդի Յակով Սորեսկին 1697 թ. մարտի 23-ին: Սովորաբար հայերը ձեռք էին բերում արդեն շնորհված հրովարտակները, հարմարեցնում իրենց պայմաններին եւ հաստատության համար ներկայացնում իշխանություններին:

Պետք է կարծել, որ այս ձեւով էլ հրապարակ է եկել խնդրո առարկա հրովարտակը: Դա տվել է արքունի գանձապահ եւ Խմելնիցկու ստարոստայի տիկին Կոնստանցա Պոտոցկայան՝ Տիսմենիցայի տիրուհին, թվականն է 1689-ը: Հետեւելով Դ. Պոտոցկուն՝ Կ. Պոտոցկայան իր վրա է վերցնում հայոց եկեղեցու քայոնձի (քահանայի) ծախսը՝ նշանակելով նրան 60 զլոտի տարեկան ռոճիկ: Նա հայերին ազատում է քաղաքի տիրոջը տրվող բոլոր հարկերից՝ տասանորդից, ոչխարի, մեղվի եւ այլ տուրքերից: Հայերը վճարելու էին միայն պետական՝ Ռեշ-Պոսպոլիտային տրվող հարկը: Նրանց թույլ է տրվում ազատորեն առեւտուր անել, գնել այն ամենը, ինչ անհրաժեշտ էր ապրուստի եւ հարստանալու համար: Նա հայերին արտոնում է վաճառել բոլոր տեսակի ալկոհոլային խմիչքներ՝ պայմանով, որ նրանք քաղաքի տիրոջը դրա դիմաց վճարեն հասանելիք տուրքը: Հայերին նա տալիս է դատական ինքնավարության արտոնություն, այնպիսին, ինչպիսին նրանք ունեին լեհական տիրապետության տակ գտնվող մյուս բնակավայրերում: Դատական ինքնավարությունն ինչպես քաղաքացիական, այնպես էլ քրեական գործերի, հանձնվում էր վոյքին եւ հայերի միջից ընտրված ներկայացուցիչներին: Ընտրությունը լինելու էր ազատ եւ համաձայն այն օրենքների, որոնք կիրառվում էին ողջ երկրում: Դատարանի որոշումներից դժգոհ անձինք վերադատության գանգատով կարող էին դիմել իրեն՝ կալվածատիրուհուն: Կ. Պոտոցկայան հայերին է հանձնում այնտեղի հողերը, ուր նախկինում գտնվել է Պշենիչնիկովյան լճակը՝ ազատելով այդ հողերը բոլոր կարգի տուրքերից: Հրովարտակի ներքեւի մասում եւ լուսանցքում եղած գրություններից երեւում է, որ այն 18-րդ դ. մի քանի անգամ հաստատվել է Պոտոցկիների կողմից:

Ինչպես տեսնում ենք, Տիսմենիցայի հայերին տրված են ճիշտ այնպիսի իրավունքներ, ինչպիսին նրանց հայրենակիցներն ունեին կվովում, Կամենիցում, Յազլովեցում ու այլ վայրերում: Զափազանց կարեւոր էր, անշուշտ, դատական ինքնավարության արտոնությունը, որը հայերին դնում էր արտոնյալ

վիճակում: Տեղական դատարաններն իրավունք չունեին դատելու հայերին նույնիսկ այն դեպքում, եթե նրանք մեղանշում էին օրենքի դեմ օտարների հետ ունեցած գործերում:

Ուշ Պուպոլիտայի սահմաններում դատական ինքնավարությամբ օժաված բոլոր համայնքներում կիրառության մեջ էր Մխիթար Գոշի Կանոնագրքի հիման վրա կազմված Աբահայոց դատաստանագիրքը, որը 1519 թ. հաստատել էր Զիգմունդ 1-ին Աբահական թագավորը:

Քաղաքային ինքնավարությունը նորություն չէր հայ բնակչության համար: Ուսումնասիրությունները ցուց են տվել, որ գեռեւս 11-13-րդ դդ. Հայաստանի մի շարք քաղաքներում կային ավագների խորհուրդներ, «գլխավորք քաղաքին», որոնց գլուխ էին անցած քաղաքապետ կամ ամիրա-քաղաքին կոչվածները, որոնք քաղաքային ինքնավարության մարմիններն էին: Այդպիսի խորհուրդներ կային Անիում, Դիլիջան, Խարբերդում, Նախճավանում, Արծնում եւ Կարսում: Ավագների խորհուրդը «լուծում էր քաղաքի կյանքին վերաբերող առավել կարեւոր հարցերը, այն է՝ ո՞ւմ իշխանությանը պետք է ենթարկվեր քաղաքը, ի՞նչ շափով հարկեր պետք է վճարեին քաղաքի բնակիչները եւ նրա տարրեր դասեր»: Այս ժամանակ էլ ահա, որպես հետեւանք քաղաքային ինքնավարության զարգացման, առաջանում են քաղաքային դատարանները⁵:

Միջնադարյան Հայաստանի քաղաքներում առաջացած ինքնավարությունը դեռեւս բարձր զարգացման շնասած, ծանր հարվածներ ստացավ եւ խափանվեց մոնղոլական տիրապետության ժամանակ: Այդ զարգացումը, կարելի է ասել, ինչ-որ շափով շարունակվեց գաղթաշխարհի կենտրոններում: Սելջուկ-թուրքերի եւ ապա մոնղոլների հարձակման պատճառով հեռանալով հայրենիքից եւ հաստատվելով այլ երկրներում, հայ գաղթականները շարունակում էին ապրել նախկինի պես եւ գործնական կյանքում կիրառում հայրենիքից բերած եւ այդ վայրերում բազմացվող դատաստանագրքերը: Կյանքի նոր պայմանները ստիպում էին գաղթականներին փոփոխություններ մտցնել իրենց օրենքներում: Մոռացվում էր լեզուն, բայց չէին մոռացվում օրենքները, թարգմանվում էին հայերին հասկանալի լեզուներով, իսկ օտար տիրակալները, հարգելով հայերի իրավունքը, թույլ էին տալիս դեկավարվել իրենց ազգային դատաստանագրքով: Փոխվում էին նաև տերմինները:

Խոսելով Տիսմենիցայի հարեւան Ստանիսլավ քաղաքի հայերի ինքնավարության մասին, լեռ ուսումնասիրող Զեսլավ Խովանեցը գրում է. «Որոշակի արտաքին այնպիսի ձեւեր, ինչպես վոյթը, լավնիկները, խորհուրդը,

⁵ Խաչիկյան Լ. Ա., 1280 թվականի Երզնկայում կազմակերպված «Եղբայրությունը», ՀՍՍՀ ԳԱ. «Տեղեկագիր» (հաս. գիտ.), 1954, N 6, էջ 78-80:

ավագները՝ հայերը վերցրել են մագդեբուրգյան իրավունքից: Սակայն դա ոչ թե ստանիսլավյան նորամուծություն էր, այլ հայոց իրավունքի տարրերի դարավոր հասարակական կյանքի արտահայտություն՝ մագդեբուրգյան քաղաքային հիմնարկությունների ֆոնի վրա, հիմնարկություններ, որոնց գոյության պայմաններում էլ ձեւավորվեցին հայկական կազմակերպության հատուկ ձեւերը, որոնք արտաքուստ հիշեցնում էին մագդեբուրգյան, բայց ներքուստ՝ իր ամբողջ ոգով հասկացողություններով եւ կոչմամբ համապատասխանում էին հայոց իրավունքին»:

Հայերին ընդունելով իրենց քաղաքի բնակիչների շարքը, հնարավորություն տալով նրանց ազատորեն զբաղվել եկամտաբեր գործերով Պոտոցկիները լրջորեն մտածում էին քաղաքի տնտեսության առաջընթացի մատին, եւ նրանք շսխալվեցին: Հայ արհեստավորները լեհաստանում հոշակված էին որպես կաշվի մշակման լավագույն վարպետներ: Նրանք մշակում եւ շուկա էին հանում մեծ քանակությամբ տարրեր տեսակի ու գույնի բարձրորակ կաշվեղեն: Լեհ հեղինակների վկայությամբ, Տիսմենիցայում հաստատված կաշեգործներն իրենց մասնագիտությունը սովորեցնում էին նաև լեհերին եւ ուկրաինացիներին: Շատ շանցած այդ ավանը դառնում է կաշվի մշակման խոշոր կենտրոն՝ մեծ եկամուտներ բերելով նաև Պոտոցկիներին:

Հրովարտակի ուժով ձեռք բերելով ազատորեն առեւտուր անելու իրավունք, Տիսմենիցայի հայերն ակտիվորեն մասնակցում էին տարանցիկ առեւտրին, առեւտրական հեռավոր ուղեւորություններ կատարում հատկապես դեպի Արեւելքի երկրները եւ եռանդուն կերպով մասնակցում տոնավաճառներին: Նաև նրանց գործունեության հետեւանքով էր, որ այդ բնակավայրը հոշակվեց որպես առեւտրի նշանավոր կենտրոն: Այդ ավանի կարեւոր դերը առեւտրական գործարքների մեջ երեւում է նաև այն ժամանակ տարածված խոսքից՝ «գները թելադրում է Տիսմենիցան»:

Հայկական ինքնավարության առկայությունը Տիսմենիցայում նպաստում էր այն բանին, որ այլեւ վայրերից մեծ թվով հայ վաճառականներ գալիս էին մասնակցելու տոնավաճառներին: Հետաքրքրական է, որ լեհահայ դատարանների իրավասության մեջ էր մտնում նաև այլ վայրերից եկած հայերի գործերի քննության իրավունքը: «Այդ ազգի եկվորների միջեւ եղած գործերը, ասվում է Յան Սոբեսկու 1680 թ. հոկտ. 29-ի հրովարտակում, - որ քննվում են տոնավաճառների ժամանակ պետք է լինին նույն ազգի (հայերի) վոյթի իրավասության տակ»: Միաժամանակ բացատրվում է այդօրինակ արտոնություն տալու նպատակը. «Դա արվելու է այն բանի համար, որպեսզի եկվոր վաճառականները որեւէ դատավորի կողմից անիրավության շենթարկվեն եւ

դրանից հետո շխորշեն այստեղի տոնավաճառներից»:

Ստացած իրավունքների շնորհիվ գաղութն ամրապնդվում է նյութապես: 18-րդ դ. Եկեղեցու բոլոր ծախսերը կատարում էր համայնքը: Այդ Եկեղեցին, նախկին փայտաշենի փոխարեն, նրանք կառուցել էին 1719 թ.:

Նրանց նյութական մեծ հնարավորությունների մասին է վկայում 18-րդ դ. միմյանց ետեւից ստեղծված հոգեւոր եղբայրությունները, որոնցից մեկը կտրիճվորաց, այսինքն՝ երիտասարդական կազմակերպությունն էր:

1739 թ. գաղութի կյանքում տեղի է ունեցել աննախընթաց իրադարձություն՝ բացվել է հայկական դպրոց, որը գործել է երկար ժամանակ: 1895 թ. վիեննա ուղարկված ձեռագրերի մեջ եղել է նաև մի «Այբբենարան», որը պատկանելիս է եղել «Գրիգորի Մոշորոյ վարժապետին Հայոց ի Թիսմինից, յամի 1879»: Ոչինչ հայտնի չէ այդ դպրոցի, այնտեղ դասավանդված առարկաների եւ ուսման դրվածքի մասին: Պետք է կարծել, որ Ս. Խոշքան, որը հեղինակ է բառարանների եւ լեհահայոց համար կազմել է հայոց լեզվի քերականության ձեռնարկ, անպայման ինչ որ ձեւով մասնակցություն ունեցել է նրա ստեղծման գործում:

Տիսմենիցայի հայերի համար բացասական ազդեցություն են ունեցել համաճարակները, որոնք պարբերաբար մոլեգնում էին լեհաստանում, մեծ թվով զոհեր խլելով բնակչությունից:

Հաճախակի փոփոխվող քաղաքական կացության, պատերազմների ու արշավանքների եւ ի վերջո՝ լեհաստանի մասնատման պայմաններում ծանր վիճակում էր հայտնիվում տնտեսությունը, առեւտրական սահմանափակումները հետեւում էին միմյանց, դժվարանում, երբեմն էլ համարյա անկարելի էին դառնում առեւտրական ուղեւորությունները, բարձրանում էին մաքսային մասհանումները, խափանվում էին տոնավաճառները: Այդ ամենը չէին կարող բացասական ազդեցություն շունենալ ազգային փոքր համայնքի վրա, որի կազմը հետզհետե նոսրանում էր: